

UNIVERZITET U SARAJEVU – INSTITUT ZA JEZIK

KOMISIJA ZA IZBOR U ZVANJE VIŠEG NAUČNOG SARADNIKA ZA OBLAST
LINGVISTIKA – BOSANSKI, HRVATSKI I/ILI SRPSKI JEZIK

VIJEĆU INSTITUTA ZA JEZIK UNIVERZITETA U SARAJEVU

**PREDMET: Izvještaj Komisije za izbor u zvanje višeg naučnog saradnika za oblast
lingvistika – bosanski, hrvatski i/ili srpski jezik**

Vijeće Instituta za jezik na sjednici održanoj 9. 6. 2026. godine donijelo je Odluku o raspisivanju konkursa za izbor u zvanje broj: 01/292/26, nakon čega je na sjednici održanoj dana 21. 7. 2026. godine donijelo Odluku broj: 01/363/26 o imenovanju Komisije za izbor u zvanje višeg naučnog saradnika za oblast lingvistika – bosanski, hrvatski i/ili srpski jezik u Institutu za jezik Univerziteta u Sarajevu u sljedećem sastavu:

1. dr. sc. Erma Ramić-Kunić, viši naučni saradnik, predsjednik Komisije, Univerzitet u Sarajevu – Institut za jezik, oblast lingvistika – bosanski, hrvatski i/ili srpski jezik,
2. dr. sc. Alen Kalajdžija, naučni savjetnik, član Komisije, Univerzitet u Sarajevu – Institut za jezik, oblast lingvistika – bosanski, hrvatski i/ili srpski jezik i
3. dr. sc. Tarik Ćušić, viši naučni saradnik, član Komisije, Univerzitet u Sarajevu – Institut za jezik, oblast lingvistika – bosanski, hrvatski i/ili srpski jezik.

Institut za jezik Univerziteta u Sarajevu objavio je Konkurs za izbor u zvanje višeg naučnog saradnika za oblast lingvistika – bosanski, hrvatski i/ili srpski jezik – jedan izvršilac. Prema tekstu Konkursa koji je objavljen u dnevnom listu *Dnevni avaz* dana 29. 6. 2026. godine i na web-stranicama Instituta za jezik i Univerziteta u Sarajevu, a u skladu s odredbama koje propisuje Zakon o naučnoistraživačkoj djelatnosti (*Službene novine Kantona Sarajevo*, br. 26/16), minimalni uvjeti za ovo radno mjesto jesu:

- VSS, fakultet s odsjekom za bosanski, hrvatski i/ili srpski jezik,
- naučno zvanje doktora nauka iz oblasti za koju se bira,
- najmanje tri godine provedene u zvanju naučnog saradnika,
- najmanje pet naučnih radova iz oblasti za koju se bira objavljenih u priznatim publikacijama, objavljena naučna knjiga i originalni naučni uspjeh kao što je naučni projekt, patent ili originalni metod, sve nakon izbora u zvanje naučnog saradnika.

Uvidom u dostavljenu dokumentaciju i Potvrdu o potpunosti i blagovremenosti pristiglih prijava broj 01/353/26 od 17. 7. 2026. godine, koju je dostavila Suada Avdić-Ćinara, sekretar Instituta za jezik Univerziteta u Sarajevu, koja je sastavni dio ovog izvještaja, Komisija konstatira da se na

konkurs za izbor u zvanje višeg naučnog saradnika Instituta za jezik Univerziteta u Sarajevu prijavio jedan kandidat:

Nihada Ibrišimović, doktor humanističkih nauka iz područja lingvistike – bosnistika, naučna saradnica Instituta za jezik Univerziteta u Sarajevu.

Uz svojeručno potpisanu Prijavu, kandidatkinja je dostavila sljedeću dokumentaciju:

1. Izvod iz matične knjige rođenih, ovjerena kopija;
2. Uvjerenje o državljanstvu, ovjerena kopija;
3. Diplomu o završenoj visokoj stručnoj spremi i diplomu o naučnom stepenu magistra s uvjerenjima o prosjeku ocjena, ovjerene kopije;
4. Diplomu o stečenom zvanju doktora nauka, ovjerena kopija;
5. Biografiju (CV);
6. Bibliografiju i spisak objavljenih naučnih radova i knjiga nakon izbora u zvanje naučnog saradnika iz oblasti za koju se bira (uz knjige i kopije radova u prilogu);
7. Dokaz o izboru u zvanje naučnog saradnika, ovjerena kopija;
8. Potvrdu sa spiskom projekata iz oblasti za koju se vrši izbor, original.

Prijava je blagovremena, uredna, potpuna i usklađena s uvjetima utvrđenim Konkursom.

Na osnovu detaljnog pregleda i analize prijave i dostavljene dokumentacije, Komisija Vijeću Instituta za jezik Univerziteta u Sarajevu podnosi sljedeći

IZVJEŠTAJ

Biografija

Nihada Ibrišimović, nučna saradnica Instituta za jezik Univerziteta u Sarajevu, rođena je 9. jula 1969. godine u Tuzli, gdje je završila osnovno i srednje obrazovanje. Nakon ratom prekinutog studija na Pravnom fakultetu u Sarajevu, upisala je Filozofski fakultet Univerziteta u Tuzli, odsjek Bosanski jezik i književnost. Diplomirala je 2001. godine odbranivši rad *Akcenatske osobine govornih medija u Federaciji Bosne i Hercegovine*. Postdiplomski studij iz oblasti lingvistike na Filozofskom fakultetu Univerziteta u Tuzli, odsjek Bosanski jezik i književnost upisala je akademske 2010/2011. godine, te magistrirala u februaru 2013. godine odbranivši rad pod naslovom *Toponimi, etnici i ktetici Ilijaša i okolice*. Iste je godine na istom fakultetu upisala doktorski studij, u okviru kojeg je odbranjena tema dokorskog rada *Mikrotoponimija Ilijaša i okolice* 2021. godine te stečeno zvanje doktora humanističkih nauka za užu naučnu oblast lingvistika.

Radni vijek započela je u Biblioteci "Behram-beg" u Tuzli, gdje je radila od 1992. do 1999. godine. Kratko se bavila prosvjetno-pedagoškim i lektorskim radom. Od 2018. do 2022. godine stručni je saradnik Instituta za jezik u Sarajevu, a od 2022. do danas radi u zvanju naučnog saradnika. Uže naučne oblasti interesovanja su joj onomastika, akcentologija i leksikologija.

Objavila je naučne i stručne radove i prikaze u različitim časopisima i zbornicima. Sudjelovala je na nekoliko naučnih skupova iz oblasti lingvistike, u nekoliko naučnoistraživačkih projekata Instituta za jezik Univerziteta u Sarajevu, te u promocijama izdanja Instituta i javnim predavanjima.

Recenzent je naučnih radova iz oblasti onomastike i leksikologije.

Naučnoistraživački rad

Bibliografija

Iz područja lingvističke bosnistike Nihada Ibrišimović do sada je objavila dvije knjige i 14 radova, od čega 11 naučnih radova, jedan stručni rad i dva prikaza. Komisija, u skladu sa zakonskim aktima, uzela je u razmatranje samo bibliografske jedinice objavljene nakon izbora u zvanje naučnog saradnika u Institutu za jezik Univerziteta u Sarajevu od 2022. godine.

Nakon izbora u zvanje naučnog saradnika Nihada Ibrišimović objavila je dvije knjige, od čega jednu monografiju i jedan rječnik u koautorstvu, šest naučnih radova, jedan stručni rad i jedan prikaz, kako slijedi:

Knjige

Ilijaška toponimija, Edicija Radovi 31, Univerzitet u Sarajevu – Univerziteta u Sarajevu, Sarajevo, decembar 2022; ISBN 978-9958-620-55-3.

Rječnik akcenatskih varijanata u bosanskom jeziku, Knjiga 1. (A-NJ), (koautorstvo: Hodžić, Jasmin; Čatović, Haris; Kalajdžija Alen; Ibrišimović, Nihada), Edicija Priručnici, knj. 16, Univerzitet u Sarajevu – Univerziteta u Sarajevu, Sarajevo, 2025; ISBN 978-9958-620-70-6.

Naučni radovi

1. "Ime i identitet u Ibrišimovićevim djelima – kognitivnoonomastički pristup", *Sandžački zbornik II: Bosanski jezik – historijski razvoj i savremeni trenutak*, Novi Pazar, 2026, str. 315–330.
2. "Onomastički determinizam u drami *Jesenji cvat* Derviša Sušića", (koautorstvo: Ibrišimović, Nihada; Mirsada Suljić), *Bosanski jezik*, UNTZ – Filozofski fakultet, Tuzla, 2025, str. 80–99.
3. "Orografski apelativi u savremenoj ilijaškoj toponimiji", *Studia lexicographica*, god. 17(2023) 32, Leksikografski zavod Miroslav Krleža, Zagreb, 2023, str. 103–127.

4. "Toponimija sela Podgora u Brezi", *Književni jezik*, br. 33/2022, Institut za jezik UNSA, Sarajevo, februar 2023, str. 123–154.
5. "Toponimi motivirani rudarskom djelatnošću na prostoru starobosanskoga Dubrovnika", *Treći simpozij o bosanskom jeziku*, Zbornik radova, Edicija Posebna izdanja, knjiga 32, UNSA Institut za jezik, Sarajevo, decembar 2022, str. 175–203.
6. "Onomastička analiza *Karabega*", *Slovo o Mostaru*, Zbornik radova sa 5. međunarodne naučne konferencije Mostar, Fakultet humanističkih nauka Univerziteta "Džemal Bijedić" u Mostaru, Mostar, oktobar 2022, str. 673–693.

Stručni rad

"Uloga društava i udruženja u razvoju nauke o jeziku u Bosni i Hercegovini u vrijeme Jugoslavije i danas", koautorstvo Erma Ramić-Kunić, *Institucionalizacija nauke o jeziku u Bosni i Hercegovini*, Zbornik radova, Edicija Posebna izdanja, knjiga XXXIII, Sarajevo, 2023, str. 78–90.

Prikaz

"Etnolingvistička raslojavanja leksike mjesnog govora u službi potvrde i očuvanja jezičkoga identiteta" (Alen Kalajdžija: Etnolingvistički slojevi bosanske leksike (na primjeru građe jugoistočnobosanskog govornog tipa – lokalitet Pazalje). Sarajevo: Univerzitet u Sarajevu, Institut za jezik, 2021, 167 str.), Godišnjak BZK Preporod 2020–2022, Sarajevo, 2022, str. 153–157.

Uz prijavu kandidatkinja je dostavila po jedan primjerak knjiga i kopije objavljenih radova. Uzimajući u obzir zakonske odredbe o uvjetima za izbor u naučna zvanja i vrednovanje postignutih rezultata u oblasti naučnoistraživačkog rada nakon posljednjeg izbora u zvanje, Komisija je ocijenila relevantnim bibliografske jedinice koje su prošle recenzentski sistem ocjenjivanja.

Ocjena bibliografskih jedinica relevantnih za izbor

Na temelju uvida u objavljene radove i priloženu bibliografiju vidljivo je da se kandidatkinja kontinuirano i sistematično bavi temama iz oblasti onomastike, posebno toponomastike i literarne onomastike. Pored navedenih istraživačkih usmjerenja, njeni radovi pokazuju i izraženo zanimanje za akcentologiju te proučavanje akcenatskih pojava, čime dodatno obogaćuje svoje naučno djelovanje u oblasti jezikoslovlja.

Pored ocjene naučne monografije i pet naučno referentnih radova, obuhvaćenih zakonskim odredbama o minimumu uvjeta za izbor u zvanje višeg naučnog saradnika, Komisija će dati kratak osvrt i na preostale bibliografske jedinice koje daju uvid u naučnoistraživačke aktivnosti kandidatkinje od prethodnog izbora u zvanje.

Knjige

Nakon izbora u zvanje naučnog saradnika 1. maja 2022. godine kandidatkinja je objavila monografiju *Ilijaška toponimija*, Edicija Radovi 31, Univerzitet u Sarajevu – Univerziteta u

Sarajevu, Sarajevo, decembar 2022, te u koautorstvu *Rječnik akcenatskih varijanata u bosanskom jeziku*, Knjiga 1. (A-NJ), (koautorstvo: Hodžić, Jasmin; Ćatović, Haris; Kalajdžija Alen; Ibrišimović, Nihada), Edicija Priručnici, knj. 16, Univerzitet u Sarajevu – Univerziteta u Sarajevu, Sarajevo, 2025.

Naučna monografija

Toponomastička monografija *Ilijaška toponimija*, (Edicija Radovi 31, Univerzitet u Sarajevu – Univerziteta u Sarajevu, Sarajevo, 2022), 513. str., bavi se toponomastičkom obradom i prezentacijom savremene toponimije Ilijaša i okolice, prikupljene iz pisanih izvora i na terenu, te etnika i ktetika istraživanoga areala čija je upotreba potvrđena na terenu. Knjiga je podijeljena u sedam velikih poglavlja (Uvod, Istraživani areal, Naselja, Klasifikacija toponima, Zaključak, Literatura i Dodaci), kojima su obuhvaćene sve relevantne tačke istraživanja i sistematske prezentacije ilijaške toponimije. Istraživani areal definiran je administrativnim granicama općine Ilijaš, koji popunjavaju katastarske općine Balibegovići, Dragoradi, Elešehovići, Hadžići – Crna Rijeka, Ivančići, Kadarići, Ilijaš, Ljubnići, Luke, Medojevići, Odžak, Rakova Noga, Srednje, Stomorine, Višnjica i Vrbovik. Istraživani korpus čini oko 10.000 toponima s oko 6.000 toponimskih različenica. Imenska građa analizirana je i klasificirana s obzirom na motiviranost imenovanja, strukturno-tvorbene modele i jezičko porijeklo i promatrana je u odnosu na obrađivanu toponimsku građu, prvenstveno na bosanskohercegovačkom prostoru, ali i u arealima izvan Bosne i Hercegovine na kojima je posvjedočeno postojanje pojedinih toponima. Sa semantičko-motivacijskog aspekta toponimi su podijeljeni na fiziogene, motivirane geomorfološkim osobinama referenta, antropogene, motivirane ljudskom djelatnošću, i onimne, motivirane drugim imenima. Očekivano, najbrojniji među njima jesu oni motivirani geomorfološkim osobinama referenta, čija je brojnost i raznovrsnost potaknuta geografskom razuđennošću ilijaškog terena, zastupljenošću različitih geografskih oblika, hidrografskim karakteristikama i bogatstvom flore i faune. Sa strukturno-tvorbenog aspekta toponimi su klasificirani na jednorječne i višerječne. Među jednorječnim toponimima izdvojeni su bezafiksadni, nastali toponimizacijom apelativa ili transonimizacijom, afiksadni, nastali sufiksalsnom prefiksalsnom i sufiksalsno-prefiksalsnom tvorbom, složenice i sraslice, te eliptični toponimi, nastali elizijom identifikacijskoga člana dvorječnih toponima, svedenih na kvalifikator. Među višerječnim toponimima dvorječni su najbrojniji, ali su zabilježeni i toponimi sa tri, četiri i više sastavnica, koji se uglavnom odnose na mikroreferente. Jezički su izvori ilijaških toponimi najvećim dijelom slavenskog porijekla, ali višestoljetna otvorenost utjecajima drugih naroda i njihovih jezika doprinijela je i brojnosti aloglotskih jezičkih elemenata. Potvrđene su i brojne osobine istočnobosanskoga (ijekavskošćakavskoga) dijalekta. Monografija sadrži akcentirani Rječnik (338–503), Karte istraživanog areala i Indeks imena i pojmova.

Rječnik

Rječnik akcenatskih varijanata u bosanskom jeziku Knj. 1. (A-NJ) (u koautorstvu dr. sc. Jasmin Hodžić, dr. sc. Haris Ćatović, dr. sc. Alen Kalajdžija, Univerzitet u Sarajevu – Institut za

jezik), 266. str., jedan je od rezultata projekta Instituta za jezik Univerziteta u Sarajevu, pod nazivom "BRAVO – Bosanski rječnik akcenatskih varijacija (ozvučen/online)", koji je podržalo Ministarstvo za nauku, visoko obrazovanje i mlade Kantona Sarajevo. Ovaj rječnik sadrži više od 8.200 natuknica s varijantskim akcenatskim rješenjima. Rječnik je pisan s namjerom da se potpunije sagleda slika akcenatskog sistema savremenog bosanskog jezika, odnosno da se predstavi građa akcenatskih varijanata koja će poslužiti za buduće ujednačavanje normativnih rješenja u akcentuaciji, računajući pritom na potrebno usaglašavanje korpusa ovjerenih različitih varijantskih rješenja i u normativnoj akcentuaciji. U toku je izrada i drugog toma ovog rječnika istog autorskog tima.

Naučni radovi

U periodu nakon izbora u zvanje naučnog saradnika kandidatkinja je objavila sedam radova i jedan prikaz.

Iz uže onomastičke oblasti toponomastike objavljeni su joj radovi: "Orografski apelativi u savremenoj ilijaškoj toponimiji", *Studia lexicographica*, god. 17(2023) 32, Leksikografski zavod Miroslav Krleža, Zagreb, 2023, str. 103–127, prethodno saopćenje; "Toponimija sela Podgora u Brezi", *Književni jezik*, br. 33/2022, Insitut za jezik UNSA, Sarajevo, februar 2023, str. 123–154, izvorni naučni rad; "Toponimi motivirani rudarskom djelatnošću na prostoru starobosanskoga Dubrovnika", *Treći simpozij o bosanskom jeziku*, Zbornik radova, Edicija Posebna izdanja, knjiga 32, UNSA Institut za jezik, Sarajevo, decembar 2022, str. 175–203, izvorni naučni rad.

U radu "**Orografski apelativi u savremenoj ilijaškoj toponimiji**" ukazano je na udio i raznovrsnost apelativa koji označavaju prirodne reljefne oblike u nastanku toponima bosanskohercegovačkih areala koje karakterizira brdsko-planinski i brežuljkasto-ravničarski teren, kakav bilježimo u sarajevskoj općini Ilijaš. Građa za ovaj rad ekscerpirana je iz ilijaškoga mikrotoponomastikona formiranoga terenskim i katastarskim istraživanjem. Cilj je istraživanja provedenoga u ovome radu ukazati na obimnost i raznovrsnost geografske nomenklature zastupljene u ilijaškoj toponimiji, koja je odraz geografskoga realiteta ispitivanoga areala i mjesnoga leksika, na njihovu plodnost, strukturno-tvorbene aspekte i etimologiju.

Na temelju terenskoga istraživanja, katastarskih podataka i historijskih izvora u radu "**Toponimija sela Podgora u Brezi**" prezentirana je i analizirana toponimija sela Podgora u općini Breza. Radom je obuhvaćeno oko dvije stotine toponimskih različenica. Uzimajući u obzir jezičke i izvanjezičke karakteristike istraživana areala, izvršena je semantičko-motivacijska i strukturno-tvorbena klasifikacija te su uočeni jezički utjecaji i aloglotski elementi u formiranju toponomastikona. Na kraju je abecednim redom dat rječnik toponima. Svi su toponimski likovi potvrđeni na terenu akcentirani.

U radu "**Toponimi motivirani rudarskom djelatnošću na prostoru starobosanskoga Dubrovnika**", na osnovu terenskoga istraživanja, ekscerpcijom iz katastarskih i drugih pisanih izvora, a prema semantičko-motivacijskom kriteriju, autorica izdvaja i opisuje toponime u vezi s rudarstvom na širem području bosanskoga Dubrovnika. Cilj formiranja i lingvističkog propitivanja ovakvoga, motivacijski jednoobraznoga toponomastikona jeste doprinijeti historijskome

rasvjetljavanju privrednoga statusa danas nenaseljenog Dubrovnika. Rad je nastao u kontekstu sveobuhvatnijeg istraživanja šireg areala, a kao onomastički pokušaj ili doprinos odgovoru na pitanje o privrednom statusu srednjovjekovnoga bosanskog Dubrovnika.

Iz uže onomastičke oblasti literarna onomastika kandidatkinja je objavila tri rada: "Ime i identitet u Ibrišimovićevim djelima – kognitivnoonomastički pristup", *Sandžački zbornik II: Bosanski jezik – historijski razvoj i savremeni trenutak*, Novi Pazar, 2026, str. 315–330; "Onomastički determinizam u drami *Jesenji cvat* Derviša Sušića", (koautorstvo: Ibrišimović, Nihada; Mirsada Suljić), *Bosanski jezik*, UNTZ – Filozofski fakultet, Tuzla, 2025, str. 80–99, izvorni naučni rad, i "Onomastička analiza Karabega", *Slovo o Mostaru*, Zbornik radova sa 5. međunarodne naučne konferencije Mostar, Fakultet humanističkih nauka Univerziteta "Džemal Bijedić" u Mostaru, Mostar, oktobar 2022, str. 673–693, izvorni naučni rad.

U radu "**Ime i identitet u Ibrišimovićevim djelima – kognitivnoonomastički pristup**" autorica u okviru literarne onomastike i kognitivne lingvistike evidentira i analizira imena u književnim djelima Nedžada Ibrišimovića s obzirom na njihovu identifikacijsku funkciju. S obzirom na obimnost korpusa, analiza se temelji na izboru literarnih imena iz Ibrišimovićeve poezije i proze, kao reprezentativnom uzorku. Ime i identitet središnji su predmet rasprave, koja ime u Ibrišimovićevom književnom tekstu promatra kao polifoni jezični znak s nizom konotativnih implikacija, uključujući historijske, kulturološke, religijske i druge koncepte s identitarnim ishodom.

U radu "**Onomastički determinizam u drami *Jesenji cvat* Derviša Sušića**" (koautorstvo sa dr. sc. Suljić Mirsada, Akademija dramskih umjetnosti Univerziteta u Tuzli), kroz prizmu suodnosa onomastičkih jedinica i razvoja dramske radnje, analizirana je drama Derviša Sušića *Jesenji cvat* (1966). Primarni cilj istraživanja bio je interdisciplinarnom analizom utvrditi na koji način imena likova prestaju biti puka sredstva identifikacije i postaju aktivni sudionici u kreiranju dramske napetosti. Teorijsko uporište rada počiva na postavkama literarne onomastike, koja proučava funkciju imena unutar umjetničkog teksta kao karakterizacijsko i stilsko sredstvo, i kognitivne onomastike, analizirajući kako imena u svijesti recipijenta funkcioniraju kao mentalni koncepti. Kroz sintezu etimoloških tumačenja i dramaturške analize, rad teži dokazati da je nemogućnost katarze i svjesno odabrani otvoreni kraj drame izravna posljedica nepomirljivosti onomastičkih identiteta likova s njihovim intimnim žudnjama, čime Sušićeva onomastika prerasta u svojevrsnu metafiziku sudbine.

U radu "**Onomastička analiza Karabega**", u kontekstu onomastičkoga iščitavanja u romanu *Karabeg* otkriva se historijski onomastički prostor. Onomastički je sloj u romanu uvjetovan višestrukim historijskim determinantama, vremenskim (smjena osmanske i austrougarske vlasti u Bosni i Hercegovini), prostornim (Mostar), kulturnim (osmanski kulturni krug) i vjerskim (islam). Onomastičkom analizom *Karabega* obuhvaćena je i kontrastivna analiza imena u monografiji Hifzije Hasandedića pod nazivom *Mustafa-Sidki ef. Karabeg* (1944) godine, koja je Ibrišimoviću poslužila kao predložak i poticaj za literarno uobličenje. Osim semantičkog i strukturnog aspekta zabilježenih imenskih kategorija u romanu *Karabeg*, imena su u radu analizirana s obzirom na

njihovu autentičnost, realističnost ili aktivnost, pri čemu se pokušalo ukazati na višestruku pragmatičnu vrijednost i funkcionalnost imena u romanu.

Ostali radovi

U koautorstvu je objavljen i stručni rad "Uloga društava i udruženja u razvoju nauke o jeziku u Bosni i Hercegovini u vrijeme Jugoslavije i danas", (koautorstvo: Ibršimović, Nihada; Erma Ramić-Kunić), *Institucionalizacija nauke o jeziku u Bosni i Hercegovini*, Zbornik radova, Edicija Posebna izdanja, knjiga XXXIII, Sarajevo, 2023, str. 78–90, u kojem se daje pregled udruženja osnovanih s ciljem unapređenja i promoviranja naučnih i stručnih lingvističkih postignuća na prostoru Bosne i Hercegovine u periodu omeđenom završetkom Drugog svjetskog rata i uspostavom socijalističke Jugoslavije krajem četrdesetih, i njenim raspadom početkom devedesetih godina prošloga stoljeća. Dat je kratak pregled osnivanja i pravaca djelovanja Društva nastavnika srpskohrvatskog jezika i književnosti NRBiH i Društva za primijenjenu lingvistiku Bosne i Hercegovine, te Sarajevskog lingvističkog kružoka, Sekcije lektora i Lige mladih lingvista te ukazano na njihovo mjesto i utjecaj na razvoj nauke o jeziku u Bosni i Hercegovini. Među savremenim društvima koja se bave izučavanjem jezika posebno su izdvojeni Bosansko filološko društvo, Slavistički komitet te Institut za bosanski jezik i književnost u Tuzli.

Kandidatkinja je u izvještajnom periodu objavila i prikaz "Etnolingvistička raslojavanja leksike mjesnog govora u službi potvrde i očuvanja jezičkoga identiteta" (Alen Kalajdžija: Etnolingvistički slojevi bosanske leksike (na primjeru građe jugoistočnobosanskog govornog tipa – lokalitet Pazalje). Sarajevo: Univerzitet u Sarajevu, Institut za jezik, 2021, 167 str.), Godišnjak BZK Preporod 2020–2022, Sarajevo, 2022, str. 153–157.

Naučni projekti

U periodu nakon izbora u zvanje naučni saradnik kandidatkinja je angažirana na četiri prijavljena projekta koja imaju saglasnost Vijeća Instituta. Kandidatkinja Nihada Ibršimović voditelj je dvaju projekata:

1. *Toponimija Breze* (2022–2025), za koji predstoji izdavanje toponomastičke monografije kao krajnjeg rezultata. Projekt je podrazumijevao terensko i katastarsko istraživanje toponima općine Breza, formiranje korpusa i njegov opis na jezičkom (fonetsko-fonološkom i morfološkom), te etimološkom i strukturno-tvorbenom nivou. Monografija će u dodatku imati akcentirani rječnik toponima Breze.
2. *Onomastička analiza imena u djelima Nedžada Ibršimovića* (2026–2030), zasnovan u januaru tekuće godine. Riječ je o prvom istraživanju ove vrste u Bosni i Hercegovini koje Ibršimovićev opus sagledava iz dosljedno primijenjene literarno-onomastičke perspektive i u okviru cjelovitog autorskog korpusa. Projekt popunjava značajnu istraživačku prazninu u bosanskohercegovačkoj onomastici, te doprinosi razvoju literarne onomastike kao relevantne naučne oblasti.

Kandidatkinja je, također, saradnik na dva projekta:

3. *Akcentatski dubleti u bosanskome jeziku* (2021–2026) (s Jasminom Hodžićem, Harisom Čatovićem i Alenom Kalajdžijom; predstoji objavljivanje drugog toma rječnika) i
4. *Bosanski akcentatski atlas* (2022–2026) (s Harisom Čatovićem i Nailom Valjevac).

Ostale reference

Nihada Ibrišimović, naučna saradnica Instituta za jezik Univerziteta u Sarajevu, u izvještajnom periodu je u okviru aktivnosti koje je organizirao Institut za jezik Univerziteta u Sarajevu održavala radionice i predavanja za srednjoškolce te promovirala izdanja Instituta. Sudjelovala je kao izlagač s temom “Funkcija onomastičkih elemenata u drami *Ugursuz* Nedžada Ibrišimovića” na Međunarodnom naučno-umjetničkom simpoziju Bosanskohercegovačka drama na domaćoj i međunarodnoj teatarskoj sceni, Tuzla (23–25. oktobra 2025), Univerzitet u Tuzli, Akademija dramskih umjetnosti (pozorište, film, radio i TV) te bila član Organizacionog odbora ovoga skupa. Radom “Ime i identitet u Ibrišimovićevim djelima – kognitivnoonomastički pristup” sudjelovala je i na međunarodnoj konferenciji održanoj u Novom Pazaru (9–11. maja 2025) pod nazivom “Bosanski jezik – historijski razvoj i savremeni trenutak”.

ZAKLJUČAK S PRIJEDLOGOM

Nakon uvida u prijavu i priloženu dokumentaciju, Komisija jednoglasno zaključuje da kandidatkinja Nihada Ibrišimović, naučna saradnica u Institutu za jezik Univerziteta u Sarajevu, ispunjava sve potrebne, formalne i suštinske, zakonom propisane uvjete za izbor u zvanje viši naučni saradnik za oblast lingvistika – bosanski, hrvatski i/li srpski jezik, a na osnovu činjenica:

1. stekla je naučni stepen doktora nauka iz oblasti za koju se bira;
2. provela je četiri godine u zvanju naučnog saradnika (u zvanje naučni saradnik izabrana je 1. maja 2022. godine), u oblasti za koju se bira;
3. nakon izbora u zvanje naučnog saradnika objavila je jednu knjigu iz oblasti u koju se bira, i u koautorstvu rječnik;
4. nakon izbora u zvanje naučnog saradnika objavila je pet naučnih radova u priznatim publikacijama, i to iz oblasti za koju se bira, te dva dodatna članka i prikaz, sve iz oblasti za koju se bira,
5. nakon izbora u zvanje naučnog saradnika voditelj je dvaju naučnih projekata, na dva naučna projekta je saradnik.

Na temelju uvida u biografiju, bibliografiju i dostavljenu dokumentaciju, te na temelju dosadašnjeg rada kandidatkinje u naučnoistraživačkim i stručnim projektima, prilikom čega je pokazala samostalnost i agilnost, Komisija nedvojbeno konstatira da je riječ o ozbiljnom naučnom istraživaču, čiji su rezultati rada korisni ne samo za Institut za jezik Univerziteta u Sarajevu već i za širu društvenu zajednicu, jer su rezultati istraživanja u oblasti kojom se bavi važni i relevantni kako za onomastiku i bosanski jezik općenito tako i za druge naučne oblasti s obzirom na to da

onimi, a toponimi posebno, predstavljaju vrijedne nematerijalne jezičke spomenike koji u sebi baštine slojevite kulturne, historijske, društvene i druge činjenice o prostoru i ljudima koji su ga oblikovali. Također, svojim naučnim i stručnim radom kroz zajedničke projekte kandidatkinja je dala značajan doprinos bilježenju i opisu akcenatskih pojava u bosanskome jeziku, čime je potvrdila kontinuiranu posvećenost i važnost rada u oblasti akcentologije.

Komisija, s punom stručnom i naučnom odgovornošću, stoga zaključuje da dr. sc. Nihada Ibrišimović ispunjava sve potrebne formalne i suštinske uvjete za izbor u zvanje višeg naučnog saradnika u Institutu za jezik Univerziteta u Sarajevu.

Prijedlog: Na temelju iznesenog te dostavljene prijave i priložene dokumentacije, Komisija predlaže Vijeću Instituta za jezik Univerziteta u Sarajevu da izabere dr. sc. Nihadu Ibrišimović, naučnu saradnicu Instituta za jezik Univerziteta u Sarajevu, u zvanje višeg naučnog saradnika za oblast lingvistika – bosanski, hrvatski i/ili srpski jezik u Institutu za jezik Univerziteta u Sarajevu te obrazloženi prijedlog putem Vijeća Grupacije humanističkih nauka uputi Senatu Univerziteta u Sarajevu na dalju proceduru i potvrđivanje.

Sarajevo, 11. 8. 2026. godine

UNIVERZITET U SARAJEVU
INSTITUT ZA JEZIK
SARAJEVO, H. Kikića 12
Broj: 01/392/26
Datum: 11. 08. 2026

KOMISIJA

Dr. sc. Erma Ramić-Kunić, predsjednik

Dr. sc. Alen Kalajdžija, član

Dr. sc. Tarik Ćušić, član